



## **Nemojte jedan drugom zavidni biti! Nemojte se mrziti i jedan drugom leđa okretati! Nemojte se jedan s drugim u prodaji lažno nadmetati i budite, o Allahovi robovi, prava braća!**

Od Ebu Hurejre, radijallahu anhu, prenosi se da je Allahov Poslanik, sallallahu 'alejhi ve sellem, kazao: "Nemojte jedan drugom zavidni biti! Nemojte se mrziti i jedan drugom leđa okretati! Nemojte se jedan s drugim u prodaji lažno nadmetati i budite, o Allahovi robovi, prava braća! Musliman je brat muslimanu, neće mu nepravdu učiniti, neće ga na cjedilu ostaviti i neće ga poniziti. Bogobožnost je ovdje", tada je rekao Allahov Poslanik pokazujući na svoja prsa i to ponovio tri puta. „Dosta je čovjeku zla da ponizi svoga brata muslimana. Jedan musliman je haram drugom muslimanu: i njegov život i njegov imetak i njegova čast."

[صحيح] [رواه مسلم]

Allahov Poslanik, sallallahu alejhi ve sellem, savjetuje da se muslimani jedni prema drugima lijepo ophode. Usto, ukazao nam je i na neke manire i obaveze koje imamo jedni prema drugima: Prvi savjet: Nemojte biti zavidni jedni prema drugima. Nemojte htjeti da nestanu blagodati koje imaju drugi. Drugi savjet: Nemojte bespotrebno povećavati cijenu, tj. da nudi što veću svotu novca lažni kupac na aukciji za neku robu. Nemojte time priželjkivati da se ostvari samo korist prodavca ili šteta kupca. Treći savjet: Nemojte se mrziti, a mržnja je suprotna ljubavi. Mržnja može biti opravdana samo kada je radi Allaha, tada je ona obavezna. Četvrti savjet: Nemojte se okretati jedni od drugih i nemojte se međusobno izbjegavati. Peti savjet: Nemojte sklapati nove trgovinske ugovore na već postojeće koje je neko sklopio, kao npr. da neko kaže: "Imam istu robu koja je jeftinija od ove ili koja je kvalitetnija" i sl. Nakon toga, Poslanik nam daje univerzalan savjet — budite braća! Nemojte raditi prethodno spomenute prekršaje! Nasuprot tome, budite pažljivi i brižni jedni prema drugima! Volite se međusobno, potpomažite se, savjetujte i jedni drugima budite na usluzi! Iz ove bratske veze proističe nekoliko zaključaka: Da se ne čini nepravda svom bratu muslimanu i da se ne ugrožava. Da ne ostavi svoga brata muslimana na cjedilu onda kada mu se čini nepravda, ako može da mu pomogne. Da ne potcjenjuje muslimana, da ga ne smatra inferiornim i ne gleda na njega očima preziranja i omalovažavanja, što je posljedica oholosti u srcu. Poslije toga, Poslanik nam tri puta skreće pažnju da se bogobožnost nalazi u srcu. Dakle, onaj čije je srce ispunjeno bogobožnošću, on će se prema drugima lijepo ophoditi, bit će svjestan Allaha i bojat će se Njega, te neće ponižavati muslimane, što je samo po sebi dovoljno kao zlo, javlja se kao rezultat oholosti. I naposljetku, ponovno nam Poslanik naglašava da je muslimanima međusobno sveta njihova krv, imetak i čast. Nemoj svoga brata ubiti, nemoj ga

fizički napasti! Također, nemoj mu bespravno uzeti imetak, a isto tako, nemoj ni njegovu čast okaljati!

<https://sunnah.global/hadeeth/bs/show/4706>

النجاة الخيرية  
ALNAJAT CHARITY

